



Na osnovu člana 10. st. 1. tačka 9, 10 i 14, člana 26. Zakona o nacionalnim savjetima nacionalnih manjina („Službeni glasnik RS“, broj 72/2009, 20/2014 - odluka US i 55/2014 i 47/2018), člana 14. st. 1. tačka 14, 15 i 19, člana 61. Statuta Bošnjačkog nacionalnog vijeća u Republici Srbiji (broj: 54-12/2018 od 8. decembra 2018.godine) i člana 57. Poslovnika Bošnjačkog nacionalnog vijeća u Republici (broj 56-12/2018 od 8. decembra 2018. godine), Bošnjačko nacionalno vijeće u Republici Srbiji na sjednici održanoj 28.04.2025. godine, donosi

ODLUKU

o potvrđivanju Memoranduma o saradnji između Bošnjačkog nacionalnog vijeća u Republici Srbiji i Ureda Vlade Kantona Sarajevo za dijasporu od 11. februara 2025. godine

Član 1.

Ovom Odlukom potvrđuje se Memorandum o saradnji između Bošnjačkog nacionalnog vijeća u Republici Srbiji i Ureda Vlade Kantona Sarajevo za dijasporu koji su potpisali šef Ureda Emir Ibrahimagić i predsjednik Bošnjačkog nacionalnog vijeća u Republici Srbiji dr. Fuad Bačićanin 11. februara 2025. godine, u Novom Pazaru.

Član 2.


Memorandum o saradnji, zaključen između Bošnjačkog nacionalnog vijeća u Republici Srbiji i Ureda Vlade Kantona Sarajevo za dijasporu, naveden u članu 1., sastavni je dio ove Odluke.

Član 3.


Ova Odluka stupa na snagu danom donošenja.
Odluku sa prilogima objavit će na zvaničnoj internet stranici Bošnjačkog nacionalnog vijeća.

U Novom Pazaru, 28.04.2025. godine
Broj: 199-09/2025

Predsjednik



Dr. Fuad Bačićanin



OBRAZLOŽENJE:

PRAVNI OSNOV ZA DONOŠENJE ODLUKE:

Pravni osnov za donošenje odluke sadržan je u članu 10. st. 1. tačka 9, 10 i 14, članu 26. Zakona o nacionalnim savjetima nacionalnih manjina („Službeni glasnik RS“, broj 72/2009, 20/2014 - odluka US i 55/2014 i 47/2018), članu 14. st. 1. tačka 14, 15 i 19, člana 61. Statuta Bošnjačkog nacionalnog vijeća u Republici Srbiji (broj: 54-12/2018 od 8. decembra 2018.godine) i člana 57. Poslovnika Bošnjačkog nacionalnog vijeća u Republici Srbiji (broj 56-12/2018 od 8. decembra 2018. godine).

RAZLOZI ZA DONOŠENJE ODLUKE:

Memorandum o saradnji zaključen između Bošnjačkog nacionalnog vijeća u Republici Srbiji i Ureda Vlade Kantona Sarajevo za dijasporu nastao je iz potrebe za saradnjom i zajedničkim djelovanjem u cilju jačanja institucionalne saradnje Bošnjaka i veza sa bosansko-hercegovačkom i sandžačkom dijasporom u oblasti povezivanja i promoviranja potencijala bosansko-hercegovačkog i sandžačkog društva, unapređenja i jačanja međusobnih veza kroz njegovanje zavičajnog identiteta.

Svrha Memoranduma je jačanje veza i razvoja sveukupnih odnosa, posebno u kontekstu afirmacije bosanskog jezika, jačanja svijesti o važnosti nauke i naučnih istraživanja, kulture i identiteta Bošnjaka, historije, sporta, turizma, ekonomije, promocije kulturno-historijskih i umjetničkih vrijednosti nastalih na teritoriji Bosne i Hercegovine i Sandžaka, s ciljem očuvanja i valorizacije kulturne baštine Bošnjaka Bosne i Hercegovine, Sandžaka i dijaspore. Kao poseban cilj ističe se bitnost saradnje institucija od nacionalnog značaja, naročito kroz poboljšanje međunarodne saradnje i regionalne stabilnosti.

Bošnjačko nacionalno vijeće u Republici Srbiji kao najviše predstavničko tijelo Bošnjaka u Sandžaku i Republici Srbiji, Ustavom i zakonom uspostavljeno i definisano kao organ manjinske samouprave koji predstavlja i zastupa Bošnjake i preko koga Bošnjaci ostvaruju svoja individualna i kolektivna prava u oblastima neposredno povezanim sa njihovim položajem, identitetom i pravima, ovim Memorandumom stvara mehanizme koji pružaju mogućnost da Vijeće efikasnije i djelotvornije ostvaruje svoje nadležnosti.

Donošenjem odluke o potvrđivanju navedenog Memoranduma ispunjavaju se potrebni pravni uslovi za njegovu implementaciju.

FINANSIJSKA SREDSTVA ZA SPROVĐENJE ODLUKE:


Za sprovođenje ove odluke nisu potrebna finansijska sredstva.




Bošnjačko nacionalno vijeće



Ured Vlade Kantona Sarajevo za dijasporu



MEMORANDUM O SARADNJI



11. februar 2025. godine



Bošnjačko nacionalno vijeće



Ured Vlade Kantona Sarajevo za dijasporu

Bošnjačko nacionalno vijeće u Republici Srbiji, MB: 17551205, sa sjedištem u Novom Pazaru, ulica 28. Novembra br. 84, regija Sandžak, Republika Srbija, kojeg zastupa predsjednik dr. Fuad Bačićanin i

Ured Vlade Kantona Sarajevo za dijasporu, ID broj: 4203287200008, sa sjedištem u Sarajevu, ulica Aleja Bosne Srebrene bb, kojeg zastupa šef Ureda Emir Ibrahimagić

dana 11.02.2025. godine, u Novom Pazaru (Sandžak, Republika Srbija), zaključili su

MEMORANDUM O SARADNJI

Memorandum o saradnji (u daljnjem tekstu: „Memorandum“) zaključuju Ured Vlade Kantona Sarajevo za dijasporu (u daljnjem tekstu: „Ured“) i Bošnjačko nacionalno vijeće u Republici Srbiji (u daljnjem tekstu: „Vijeće“).

Ured i Vijeće se u daljnjem tekstu pojedinačno nazivaju „Strana“, a zajednički se nazivaju „Strane“. Prepoznajući potrebu za saradnjom između Strana u aktivnostima u zajedničkom djelovanju u cilju jačanja institucionalne saradnje Bošnjaka i veza sa bosansko-hercegovačkom i sandžačkom dijasporom u oblasti povezivanja i promoviranja potencijala bosanskohercegovačkog i sandžačkog društva, unapređenja i jačanje međusobnih veza kroz njegovanje zavičajnog identiteta;

Pridajući veliki značaj širenju duha dijaloga i saradnji kao jednom od ključnih sredstava osnaživanja međusobnih veza;

U želji jačanja i promocije bosanskog jezika, nauke, kulture, historije, ekonomije i turizma i prepoznajući pogodnosti koje proizilaze iz povećane saradnje, **usaglasili su se o sljedećem:**

Član 1.

(Predmet i svrha saradnje)

Memorandum o saradnji između Vijeća i Ureda potpisuje se u cilju jačanja veza i razvoja sveukupnih odnosa, posebno u kontekstu afirmacije bosanskog jezika, jačanja svijesti o važnosti nauke i naučnih istraživanja, kulture i identiteta Bošnjaka, historije, sporta, turizma, ekonomije, promocije kulturno-historijskih i umjetničkih vrijednosti nastalih na teritoriji Bosne i Hercegovine i Sandžaka, s ciljem očuvanja i valorizacije kulturne baštine Bošnjaka Bosne i Hercegovine, Sandžaka i dijaspore.

Kao poseban cilj ističe se bitnost saradnje institucija od nacionalnog značaja, naročito kroz poboljšanje međunarodne saradnje i regionalne stabilnosti.

Saradnja između Strana, potpisnica Memoranduma, odvijati će se u skladu sa općim aktima i pravilima potpisnica ovog Memoranduma i na osnovu potpisanih Ugovora za pojedinačne programe i projekte.

Memorandum o saradnji potpisuje se u svrhu razmjene iskustava, pružanja podrške i pomoći potpisnica u provođenju programskih sadržaja i projekata iz oblasti predmeta saradnje.

Član 2.

(Nadležnosti Strana u pogledu bosanskohercegovačke dijaspore)

U skladu sa Uredbom o osnivanju Ureda za dijasporu, Ured će u cilju jačanja saradnje u oblasti obrazovanja, nauke, kulture, sporta i privrede u saradnji sa resornim ministarstvima, univerzitetima, te drugim nadležnim organima i institucijama u Kantonu Sarajevo i jedinicama lokalne samouprave vršiti stručne i administrativno-tehničke poslove u cilju povezivanja sa institucijama, organizacijama i pojedincima iz dijaspore u pomenutim oblastima.

Cilj Ureda je i podsticanje i kreiranje zajedničkih programa, angažovanje na osmišljavanju i realizaciji projekata učešća i saradnje mladih, razmjene učenika i studenata, kao i naučnih i stručnih kadrova između Kantona Sarajevo i zemalja u kojima dijaspora živi.

Ured će također raditi na informisanju naših građana koji žive i rade u inostranstvu o mogućnostima i uslovima za zapošljavanje u Kantonu Sarajevo, podsticanju povezivanja privrednika i udruženja privrednika iz dijaspore sa privrednim subjektima u Kantonu Sarajevo, iniciranju osnivanja namjenskih finansijskih fondova ili fondacija u saradnji sa našim građanima koji žive i rade u inostranstvu, podržavanju rada inovatora i inovacija iz Kantona Sarajevo i dijaspore, te podsticanju učešća naših građana u inostranstvu u promociji turističkog potencijala Kantona Sarajevo, itd.

Poslovi Ureda odnosit će se i na podsticanje upisa i studiranja mladih iz dijaspore pod jednakim uslovima koji važe za studente iz Kantona Sarajevo, razvijanje mogućnosti, odnosno osnivanje fonda za stipendiranje učenika iz dijaspore, uspostavu redovnih posjeta edukacionog karaktera mladih iz dijaspore u Kanton Sarajevo, kroz organizaciju uzajamnih projekata, ljetnih škola i druženja mladih.

Aktivnosti Ureda će se odnositi i na podsticanje i pojednostavljenje procesa povratka u Bosnu i Hercegovinu, te pružanje administrativne i tehničke pomoći, usluge i davanje informacija o različitim procedurama vezanim za administraciju u raznim segmentima života, kao i pružanje informacija potrebnih za ostvarivanje prava osoba koje se iz dijaspore vrate u Kanton Sarajevo.

Ured će također uspostaviti i voditi Registar udruženja i organizacija dijaspore.

Vijeće, kao najviše političko i predstavničko tijelo bošnjačkog naroda u Republici Srbiji i Sandžaku u skladu sa zakonom i svojim statutom, preko svojih organa samostalno zauzima stavove, pokreće inicijative i preduzima mjere u vezi sa svim pitanjima koja su neposredno povezana sa položajem, identitetom i pravima Bošnjaka. Zakonom su mu povjerena određena javna ovlaštenja da učestvuje u odlučivanju ili da samostalno odlučuje o pojedinim pitanjima iz oblasti kulture, obrazovanja, informisanja i službene upotrebe jezika i pisma u cilju ostvarivanja kolektivnih prava Bošnjaka na samoupravu u tim oblastima.

U skladu sa zakonom Vijeće ima pravo da slobodno zasniva i održava miroljubive odnose unutar Republike Srbije i van njenih granica sa institucijama i licima koja zakonito borave u drugim državama, posebno sa onima sa kojima imaju zajednički etnički, kulturni, jezički i verski identitet ili zajedničko kulturno naslijeđe.

Član 3.

(Zajedničke aktivnosti)

U okviru zajedničke saradnje Strane potpisnice ovog Memoranduma će:

1. Redovito razmjenjivati relevantne informacije o kontaktima, aktuelnostima, događajima, istraživanjima, statističkim i drugim materijalima, kao i dijeljenje stručnog znanja, iskustava i resursa, a koji su od zajedničkog interesa za obje Strane;
2. Poduzimati zajedničke aktivnosti na ostvarivanju i realizaciji programa i projekata iz oblasti obrazovne, naučne, privredne, sportske i kulturno-umjetničke saradnje s ciljem očuvanja i njegovanja maternjeg jezika, kulture i tradicije bošnjačkog naroda Bosne i Hercegovine i Sandžaka;

3. Raditi na zaštiti i promociji historijskih, tradicijskih, nacionalnih, prosvjetnih, socijalnih, kulturnih i drugih ljudskih i društvenih vrijednosti;
4. Biti pozivani na relevantne događaje, seminare, konferencije i slične aktivnosti koje međudobno podržavaju;
5. Podržavati realizaciju programa i projekata Vijeća;
6. Podržavati zajedničke aktivnosti putem svojih komunikacijskih kanala po izboru (web, društvene mreže, tiskani materijal i ostale relevantne platforme);
7. Olakšati međusobno povezivanje sa relevantnim tijelima, kao i sa drugim organizacijama koje mogu pridonijeti zajedničkim aktivnostima i ciljevima;
8. Biti saglasne da se Vijeće unese u Registar udruženja i organizacija dijaspore, a koju vodi Ured.
9. Uspostavljati i druge oblike saradnje koji nisu sadržani ovim Memorandumom.

Svi projekti koji se budu zajednički realizirali imaju biti u skladu sa osnivačkim dokumentima Strana potpisnica i u skladu sa relevantnim zakonodavstvima država gdje su uspostavljena.

Član 4. (Rješavanje sporova)

Sva sporna pitanja koja mogu nastati između potpisnica, a u vezi su sa ovim Memorandumom bit će rješavana sporazumno, međusobnim dogovorom strana koje su zaključile ovaj Memorandum i u duhu dobre poslovne saradnje.

Član 5. (Važenje, raskid i izmjene)

Ovaj Memorandum stupa na snagu danom njegovog potpisivanja od strane ovlaštenih predstavnika Strana.

Ovaj Memorandum važi i ostaje na snazi dvije (2) godine od datuma njegovog potpisivanja. Svaka Strana može u bilo kojem trenutku raskinuti ovaj Memorandum dostavljanjem pisane obavijesti o raskidu drugoj Strani jedan (1) mjesec unaprijed.

Ovaj Memorandum se može izmijeniti i/ili dopuniti uz obostrani pristanak Strana u pisanoj formi. Ovaj Memorandum se može produžiti uz uzajamni dogovor Strana.

Član 6. (Broj primjeraka)

Ovaj Memorandum je sačnjen i potpisan u 4 (četiri) izvorna primjerka, od kojih svaka Strana potpisnica Memoranduma zadržava po 2 (dva) primjerka.

U znak razumijevanja i prihvatanja ovog Memoranduma i svih njegovih odredbi ovlašteni predstavnici sporazumnih Strana isti su potpisali i stavili pečate.

**Bošnjačko nacionalno vijeće
u Republici Srbiji**

Predsjednik

Dr. Fuad Bačićanin

Broj: 73-12/2025

Datum: 11.02.2025.

**Ured Vlade Kantona Sarajevo
za dijasporu**

Šef Ureda

Emir Ibrahimagić

Broj: 14-45-3877-2/25

Datum: 11.02.2025.